

O LE SULU SAMOA



EKALEZIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

TESEMA 2020

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

Saunoaga Faamanuia Taitaifono Fono Tele

“O ou paia Samoa e mai Saua e oo atu i Falealupo. O paia e lē mafai e se vave ona suia pe faaopoopo, o paia ua malutuāpapa, e mai le vavau e oo i le faavavau. Ia nu’unu’u atu ia ou paia i to’oto’o uli, o faleupolu tofia latou te tausia ma puipui, auā o le latou fatuaiga tausia. A ua tatou sagisagi ai nei faamanuao ona o le agalelei mai o le tatou Tapa’au Sili i le Lagi. O Ona lava aao alofa o loo leoleoina ai lou soifua Samoa. Mai le amataga o lenei tausaga seia aulia mai lenei vaitau tāua ma le i’uga o le tausaga. E viia ma faafetaia le Atua soifua e ou mea uma, ona o Lona faamaoni fa’aalia ia Samoa ma ona tagata. O loo vaaiā pea le faamamalu mai o Ona aao agalelei i luga o i tatou. Ua lē masino le vevesi o le lalolagi i aafiaga o le faama’i – ae sa oo mai lava i ou laufanua ma ou ogasami. Ae o le a se tali? Ioe, Samoa, e fai vavega le Atua. E aoao Lana pule i mea uma lava. Ma o Lana pule lea ua malutia ai lo outou soifua ma le ola, a o tatou i ai i le folauga faai’ui’u o lenei tausaga. Faafetai, ia viia pea le vūiga o lo tatou Atua e faavavau faavavau lava.

Ae faapito augafa se faamatalaga i le Ekalesia Faapotopotoga Kerisiano Samoa – i Samoa nei ma atunuu e mamao. Talofa lava, malo le soifua, malo le galulue, malo le taupati, i le atia’eina o le Tala Lelei a Iesu Keriso i ou afioga ma alaalfaga, i atunuu ma aulotu o loo galulue ma aumau ai. E fai ai ma sui o le Laulau a le Fono Tele e faaleo atu ai le faafetai tele, i le paia o le Ekalesia. Matua Penisione, susuga i Toeaina ma Tiakono Toeaina, le aufaigaluega Faifeau ma Faletua, Faifeau Tausi Aiga, A’oa’o Fesoasoani, o afioga i Tiakono, Tama ma Tina ma le loaloa o le Ekalesia Faapotopotoga Kerisiano i Samoa ma atunuu e mamao, i Aulotu o Pulega ma Matagaluega. Faamalo le galulue, i le tautuaina o le Atua soifua ma Lana Tala Lelei ma le Ekalesia. Faafetai i le aufaigaluega folafola o le Tala Lelei, i le galuega faifaipea o le tapu’eina o le ola faaleagaga o tagata lolotu. Ae maise o le faamaopoopoina ma le faamalosiā o le ola tapua’i o tagata. Ia viia le Atua i le soifua fa’aaogāina.

Faafetai i Aulotu a le Ekalesia Aoao i Samoa ma atunuu e mamao. Faafetai i lo outou alolofa i le aufaigaluega a le Atua, i le tausiga ma le faa’oloina ae maise o le ofoina atu o le fesoasoani i taimi mo’omia. Faamalo foi onosai ma faapalepale i le tagata ese o loo mau ma oe, ona o le galuega a Keriso. E momoli foi le faamalo ma le faafetai i le susuga i le Alii Pule ma le aiga Faiaoga i le Kolisi Faafaipea i Malua i lau matafaioti tau’ave, o le a’otauina o fanau mo le galuega paia a le Atua. Faamalo galulue. Le paia e, o le Ekalesia i ona tulaga faalupe, e avatu le faafetai tele mai le ta’ele o le loto, ona o lou mā’au ma lou agalelei. O lau faiga taulaga o lenei tausaga 2020. Ua taulimaina, ua faitauina, ma faamaopoopoina - ua tele na’uā, ma ua maua lou alofa i le Atua ma Lana Ekalesia. Faafetai tele.

(fa’auma itulau 16)

FAASINO UPU

1.	SAUNOAGA FAAMANUIAALE	
	TAITAFONO FONOTELE	1
2.	O LE LAUGA	2
3.	FAAU'UGAMALUA 2020	3
4.	TALAAGAA'OA'O FAAU'U	4
5.	EFKS PETANIA-FOU, FALEATA6	
6.	FAILAUGA SULU SAMOA 2021 7	
7.	MEA'AI TATAU MALE ASO	8
8.	EFKS TAELEFAGA	13
9.	EFKS TUFUTAFOE	14
10.	O E UAFAILLAGI	15

O LE LAUGA

Tusi Faitau: F. Tuai – Iopu 2:9-10
F. Fou – Roma 5:1-11

Matua: Roma 5, *“O le onosai e tupu ai le mautinoa, o le mautinoa e tupu ai le faamoemoe; ⁵o le faamoemoe foi e lē mā ai, auā ua faamaligi mai le alofa o le Atua i o tatou loto e le Agaga Paia ua foa'iina mai ia te i tatou.”*

Manatu Autu (Tusi Faitau Aso): **PUAPUAGĀ MA FAAMOEMOEGA** (Suffering and hope)

Aotelega o le Manatu Autu – Mitamita i puapuagā e tupu ai le faamoemoe.

O le uiga masani lava lea faaletagata soifua – o le tupu loa o puapuagā, ona pei lea o le a sa'i i le Atua, pe aiseā ua oo mai ai nei faafitauli i lona olaga. Silasila foi i upu a le avā i Iopu e pei ona faamauina ai i le Iopu 2, *“⁹Ua e taofi mau pea ea i lau amiotonu? Ina faifai ia e oe o le Atua, ma e oti ai.”* Ioe, e matuā leai, leai lava ma se upu e tasi e tau maua ai se mafanafana mo si toeaina o Iopu i ona mafatiaga ma puapuagā ua luluti mai. Peitai, e ese ma le manaia o le tali a Iopu i lona to'alua, *“¹⁰Ua e tautala mai, e pei ona tautala mai o se tasi o le vao fafine vālea; ua tatou talia mea lelei mai le Atua, a e tatou te lē talia ea ma mea leaga?”*

O Iopu o se tagata sa masani i le ola fiafia, ona o le tele o faamanuiaga a le Atua sa sasa'a mai mo ia, ona o lona faamaoni i luma o le Atua. O le ala tali atu lena o Iopu i lana avā, auā ua iloa e Iopu, e lē na o ni mea lelei e maua i le olaga lenei; e i ai foi ma mea lē

lelei i totonu o le olaga lenei. Lea la ua tali mai ai Iopu, pe a talia ea la na o mea lelei ae faapefea mea leaga? Ua mautinoa lelei e Iopu, a maua le malū pe a te'a afā. Ua iloa lelei lava e Iopu o lona Atua e alofa faamaoni ia te ia, pe a onosa'i i puapuagā. E talitonu le toeaina, o mea tiga ma puapuagā ia e tofotofoina ai e lona Atua lona iloa, ma lona faatuatua pe a tumau ai pea i lona Atua i totonu o ona puapuagā.

Fai mai Paulo i le Ekalesia i Roma, *“³A ua tatou mitamita foi i puapuagā, ina ua tatou iloa o le puapuagā e tupu ai le onosai, ⁴o le onosai e tupu ai le mautinoa, o le mautinoa e tupu ai le faamoemoe (hope); ⁵o le faamoemoe foi e lē mā ai, auā ua faamaligi mai le alofa o le Atua i o tatou loto e le Agaga Paia ua foaiina mai ia te i tatou.”* Roma 5. Ioe, o le galuega mana lea a le Agaga Paia, lea ua fua mai ai le faamoemoe i o tatou loto. A oo foi ina tupu tele mai le faamoemoe, ona tatou lē toe lagonaina lea o se tiga i totonu o puapuagā, a e mitamita ai o tatou tagata ina ua i ai ni mea e lu'itauina ai lo tatou faatuatua i lo tatou Atua. ‘Look deeply into your sufferings and you will see the holiness of God within the dark hours of your life, and you will find hope looming out of that darkness.’ Silasila toto'a i totonu o ou puapuagā, ona e iloa lea o le mamalu o le Atua i ou ituaso pogisā, ona e iloa ai lea o le faamoemoe ola ua pupula mai i totonu o lona pogisā tele. O iina e te iloa ai le 'a'ao faaola o le Atua ua aapa mai, ma si'i 'ese oe mai totonu o ou puapuagā, ma avatu ai ia te oe le faamoemoe ola ua i ai i le toetu o Keriso. O lona uiga foi, po o fea lava e fesoua'iina i ai lou ola ona o puapuagā, ia u'u mau pea le aao o le Atua, ae 'aua e te faavaivai ai i ou puapuagā.

O lu'itau ma mafatiaga o le olaga lenei ua na o ni matagi oso vale i le ala e taumafai e faavaivaia ai lou faamoemoe, ma lou faatuatua i le alofa tunoa o le Atua. Lea ua fai mai ai Paulo, ua faamaligiina mai e le Agaga Paia mo i tatou. Ioe! Ua na o ni peau e faafua, ma tau faamata'u mai ia i tatou a e lē fati, leaga o loo leoleoina e le alofa tunoa o le Atua, Lana tagata na la faia i le amataga. O la le aposetolo, e leai lava se isi mea e toe mafai ona ia aveeseina mai i tatou i le alofa tunoa o le Atua le Tama ua ia Keriso Iesu. Po o a lava la puapuagā ma mea tiga, e tupu pea lo tatou faamoemoe, leaga ua uma ona tauamoina e Keriso le mamafatū o mea leaga uma na malaia ai i tatou, a o le'i oo mai le faaolataga, lea na ala mai i Lona lava Alo pele e toatasi.

Ioe, o le Tala Lelei e faailoa mai ai i le lalolagi atoa, ua lē mafaia e puapuagā ona taofia le Keriso mai le oo atu i Lona mamalu, ina ua toetu manumalo Keriso nai e ua oti ma le tuugamau, ma ua faapaleina ai i le palealii o le ola faavavau, ma afio ai o Ia i le itu taumatau o le Atua le Tama, ma pule faatasi ai ma Lona Tama i le mafutaga ma le Agaga Paia.

Le fanau e, a le Atua ae maise ai i lana Ekalesia EFKS Aoao, o se faamanatu tāua foi lea mo i tatou Lana fanau i la le faatuatua, ae maise lava i lenei vaiatau i le feagai ai o le lalolagi ma puapuagā ogaoga ona o faama'i faigatā, ae maise foi lenei masina o Tesema i feau faai'u o le tausaga. Ia tatou loto tetele pea auā o nei mea uma ma nei puapuagā, ua lē o toe i ai so latou malosi, auā o puapuagā sa i luga o tau'au o Keriso sa tanumia faatasi ai ma Iesu, ae peita'i na toe faatuina mai e le mana o le Agaga o le Tama, ae ua lilo atu ai lava nei puapuagā i le loloto o le palapala ma le tuugamau matagā, ae toe afio mai ai na o le Keriso i Lona mamalu silisili ese, ma aumai ai le faamoemoe ola i le ola faavavau mo Lana fanau faatuatua uma.

Ioe, o le ala pese mai lena o le aposetolo ina ia tatou mitamita i puapuagā, leaga o puapuagā na ala mai ai manuia o le lalolagi agasala, ma i tatou uma tagata vaivai. Mitamita laia i puapuagā auā e tupu tele ai le faamoemoe, ina ua manumalo a'ia'i ai Keriso i nei faigata ona o le alofa tunoa o le Atua ua faamaligiina mai mo i tatou ma le lalolagi atoa. Loto tetele ma faamalolosi i feau ma tiute o totoe o lenei tausaga, auā o loo soifua pea le Atua o le lagi ma le lalolagi, ma leoleo mai ai pea i Lana Ekalesia ma si o tatou atunuu pele o Samoa i nei vaiatau o puapuagā. Ia manuia tele le Laulau a le Fono Tele, le Komiti a Tamā o le Ekalesia, le nofo a komiti galulue eseese a le Ekalesia, le loaloa o Faifeau ma faletua, Tiakono ma faletua, A'oa'o Fesoasoani ma faletua, le lasilasi o le Ekalesia i ona itu tetele ma ona itu taulagi, o ona tagata faatuatua uma, le paia i le ofisa tutotonu; ae maua foi se malosi o le atalii o Petana i le alofa o le Atua. Ona o Iesu. Amene.

*Saunia: Falevī Petana FS,
EFKS Maota, Matagaluega FAASALELEAGA.*

Faafetai tele i le aufailauga o le Sulu Samoa o lenei tausaga 2020. Malo le utagia o le faatofalaiga a Tama o le Ekalesia, ina ia sologa manuia le faasalalauina o le Tala Lelei ia Iesu Keriso. Ia saga faamanuia atu le Atua.

SAUNIGA LOTU FAAFETAI & FAAMANUIA KOLISI I MALUA

O le afioga Taitaifono Fono Tele, Tunumoso Soliola Iosia FT na taitai le sauniga, fai le Lauga ma le Tatalo faapitoa mo le Au faau'u, i le sauniga o le Faafetai ma Faamanuia a le Kolisi Faifeau Malua o lenei tausaga, i le Aso Toonai 5 Tesema 2020. O le Sauniga na tauaao atu ai Tusi Pasi o susuga A'oa'o Faai'uaso ua i'u manuia le taumafai i le mae'a ai o le 4 tausaga. O le afioga Sui Taitaifono Fono Tele/Failautusi Komiti Au Toeaina, Iosefa A. Uilelea FT na faitauina le Tusi Paia (FT- Esoto 19:17-19; FF - Fa'aa.21:15-19), a o le susuga Fa'au'uga Mata'utia FT (KMTA Faleata) na ta'ita'iina Talosaga o le Tapuaiga. Na faatumulia le Fale Iupeli i Malua i le mamalu o le Ekalesia i Toeaina, Faifeau ma Faletua, o matua ma aiga o le Vasega Faai'uaso. Sa auai le afioga i le Ao mamalu o le Malo Samoa faapea le Alii Palemia ma nisi o ta'ita'i faalemalo ma ulu o Matagaluega, Faalapotopotoga ma Pisinisi.

O le afioga i le Alii Pule o le Kolisi, susuga Maafala Lima FS na saunoa i le Tala Faaletausaga o taulumaga o galuega a le Kolisi, amata mai ina ua faato'a a'e 29 Ianuari 2020, e ala i le Sauniga Lotu na amata aloaia ai galuega o le tausaga na taitaiina e le susuga Tavita Anesone FT le Taitaifono Komiti Au Toeaina/Komiti Malua; na faafeiloai ai i le Su'ega A'e Tausaga Muamua i A'oa'o ma Faletua, faapea susuga Faia'oga e to'a lua, o Clarke Stowers ma le faletua ia Fofogaolevai, ma le susuga Tutoatasi Toalima ma le faletua ia Fetu. O A'oa'o Faiaoga nei ua i'u mai le Kolisi Faafai'ega Fiti i le 2019 ma la'ua faailoga o le Master of Theology (Distinction), ma ua galulue i lalo o le Matagaluega o le Tala Faasolopito o le Ekalesia. O le masina Ianuari sa talimalo ai le Kolisi i le feiloaiga/mafutaga a le Au Toeaina EFKS ma le EFKAS. O le 'ava o le feiloaiga na saunia e le Kolisi faapea gasesega uma, a o le susuga i le Sui Pule Dr. Vaitusi Nofoaiga FS na saunia le Pepa mo lea mafutaga. O le amataga foi o le tausaga na toe taliu atu ai le susuga Faifeau Faiaoga o Dr. Malutafa Faalili ma le faletua ia Josephine ma le fanau i Newcastle Ausetalia, mo lona faauuga i le faailoga o le Doctor of Philosophy in Theology i le University of Newcastle Ausetalia. Malo le saili malo! O le kuata lua na faamavae ai le Kolisi ma le susuga Dr. Imoamua Setefano FS ma le faletua ia Amelia ma le aiga ona o sailiga togafitiga.

(fa'aauau itulau 5)

TALA'AGA O A'OA'O FAAU'U

MALUA 2020

Faailoga-Diploma of Theology

1. **Asoiva Saofa'i** Nu'u - Vaovai, Saleilua
Faletua - **May Saofa'i** Gautavai
Aulotu na su'e mai ai EFKS Kalaiestetete
Matagaluega: NIU SILA SAUTE
2. **Peniata Laulau** Nu'u - Tuvalu
Faletua - **Gloria Laulau** Pata, Falelatai
Aulotu na su'e mai ai EFKT
Matagaluega EFKT, TUVALU
3. **Talolua Saia** Nu'u - Vaiusu, Solosolo, Siufaga
Faletua - **Nessa Saia** - Faleula, Fasitoota
Aulotu na su'e mai ai EFKS Melepone
Matagaluega VITORIA

Faailoga - Bachelor of Theology (level 7)

4. **Anesone Anesone** Nu'u - Alafua
Aulotu na su'e mai ai EFKS Alafua
Matagaluega FALEATA
5. **David Atapana Mafua** Nu'u-Mulifanua, Falelatai
Faletua - **Leah Mafua** Nu'u - Falelatai, Siutu, Malie
Aulotu na su'e mai ai EFKS Perth
Matagaluega VITORIA
6. **Emani Tevaga** Nu'u - Patamea
Faletua - **Naitosara Tevaga** - Apia
Aulotu na su'e mai ai EFKS Hamilton
Matagaluega NIU SILA SAUTE
7. **Ken Titi** Nu'u - Vaiala, Tafua-tai
Faletua - **Temisa Titi** Porirua, Atafu Tokelau
Aulotu na su'e mai ai EFKS Porirua
Matagaluega NIU SILA SAUTE
8. **Keti Iupeli** Nu'u - Puleia Palauli
Faletua - **Vetta Iupeli** Vaigaga
Aulotu na su'e mai ai EFKS Puleia
Matagaluega FAASALELEAGA
9. **Luulau Taulagi** Nu'u - Gautavai, Iva
Faletua - **Faauga Taulagi** Gautavai, Lano
Aulotu na su'e mai ai EFKS Gautavai
Matagaluega FAASALELEAGA

10. **Maka Galuega** Nu'u - Atafu Tokelau
11. **Mauola Taito** Nu'u - Vailuutai
Faletua - **Rona Taito** Alafua
Aulotu na su'e mai ai EFKS Kingsland
Matagaluega NIU SILA SAUTE
12. **Moeava Mausali** Nu'u - Nukulaelae Tuvalu
Faletua - **Mihikini Mausali** - Funafuti
Aulotu na sue mai ai Ekalesia Kelisiano Tuvalu
Matagaluega Ekalesia Kelisiano TUVALU
13. **Nuufagata Peleiupe** Nu'u-Siutu, Salailua
Faletua - **La'ala'ai Peleiupe** - Solosolo, Samauga
Aulotu na su'e mai ai EFKS Solosolo
Matagaluega APIA SASA'E
14. **Peniamina Toailoa** Nu'u - Laulii, Fasitoota
Aulotu na su'e mai ai EFKS Fairfield
Matagaluega NIUSAUELESE
15. **Salevao Leone** Nu'u - Siumu, Leusoalii
Faaefaleupolu Leone - Vaigaga, Apolima, Saleaula
Aulotu na su'e mai ai - EFKS Hamilton
Matagaluega MANUKAU
16. **Sinapati Sone** Nu'u - Solosolo
Faletua - **Aomalua Sone** Lepa
Aulotu na su'e mai ai EFKS Solosolo
Matagaluega APIA SASA'E
17. **Tafatolu Bently** Nu'u - Leauvaa, Afega
Faletua - **Emelia Bently** Apolima, Laulii
Aulotu na su'e mai ai EFKS Logan City
Matagaluega KUINISELANI SAUTE
18. **Tiafau Vaega** Nu'u - Saaga, Paia, Sinamoga
Faletua - **Lucy Vaega** Falelatai, Iva, Safotu
Aulotu na su'e mai ai EFKS Mt Druitt
Matagaluega NIUSAUELESE SISIFO

Bachelor of Divinity (Honors)

19. **Falepau Tuiluga** Nu'u - Vailele, Fagalii
Caroline Tuiluga-Matautu Falelatai, Sauano Fagaloa
Aulotu na su'e mai ai EFKS Southside
Matagaluega KUINISELANI

20. **Fenika Faalave** Nu'u - Vaiala, Lotofaga,
Faala, Fusi Safotulafai
Faletua - **Amelia Tuna** Faalave - Tonga
Aulotu na su'e mai ai EFKS East Tamaki
Matagaluega MANUKAU

21. **Fetu Fetu** Nu'u - Laulii, Poutasi
Faletua - **Ilaisa Fetu** Moataa, Saleimoa
Aulotu na su'e mai ai EFKS Tullamarine
Matagaluega VITORIA

22. **Meafou Ah Ching** Nu'u - Vaitele fou
Faletua - **Sapia'i Auelua** Ah Ching - Lepa
Aulotu na su'e mai ai EFKS Peteleema fou
Matagaluega FALEATA

23. **Paulo Sepuloni** Nu'u - Vailele, Fogasavaii
Aulotu na su'e mai ai EFKS Vailele
Matagaluega APIA SASA'E

KOLISI FAIFEAU MALUA

(mai itulau 3)

O le susuga Imoamua ma le Faletua na amata galulue faiaoga i le 2010 i le matagaluega o le Mataupu Silisili. Talosia le faamoemoe o le susuga i le faifeau foma'i ma le aiga. O loo fa'auau pea le Aoga Tusi Paia Malua e ui ina tele faafitauli ae maise i aafiaga o le Faama'i Koviti19. O auala faatekonolosi pei o le ZOOM ma le SKYPE, ae maise le auala o le MOODLE e fai paaga ai ma le CSL, ua fesoasoani tele i lenei polokalame. Ua aloaia foi faailoga ma Tusi Pasi i lenei A'oga Tusi Paia e ala i faiga paaga ma le SQA a le malo. O le tausaga nei foi na fausia ai le maota faapitoa mo susuga faiaoga i Salelologa Savaii, na fausia e le Matagaluega Faasaleleaga. Ua faia nei le polokalame i luga o le EFKSTV, o le Tusi Paia ma Lana Feau Faaperofeta. O le auala ua ta'ua o le MOODLE lea foi o loo fesoasoani tele i fesootaiga i a'oa'oga i le va o susuga Faiaoga ma susuga A'oa'o. O aso 18-20 Mati 2020 na faia ai le Mafutaga a Kolisi Faafaifeau Malua, Piula ma Kanana Fou i le laumua o le Metotisi i Piula. O le Peresetene Ekalesia Metotisi, susuga Faulalo Leti na ta'ita'i le sauniga e tatala ai le mafutaga a le Usoga, a o le susuga i le Alii Pule o le Kolisi Piula Rev. Dr. Mosese Mailo na ta'ita'i le Sauniga o Moliga'o i le Vaveao o le toe aso, ma talosia ai le lalolagi i le faamai Koviti19. O le aso 22 Aokuso na

faia ai le Faau'uga o A'oa'o i Samoa i le tofi Faifeau Samoa e avea ma auuana o le Upu ma Sakarameta. O le sauniga lea na faau'u ai le susuga Faiaoga ia Kara Ipuniu FS ma le faletua ia Tuluiga. Ua 3 nei tausaga talu ona galue le susuga i le faiaoga i le Aoga Tusi Paia Malua. O le masina foi o Aokuso i ona aso 28 - 30 na faia ai le malologa e mapu ane ai teisi (retreat) le Pule, Faiaoga, Faletua ma Fanau i le Amoa Resort i Savaii, mo se faasiliga malosi toe faafou e fa'auau ai feau ma galuega mo le kuata mulimuli o le tausaga. Sa i ai le ulua'i faamoemoe e faia leni mapusaga teisi i le aai paia i Ierusalem, peitai ua le o gatasi le futia ma le umele ona o aafiaga o femalagaiga talu le faama'i Koviti19. O loo fautuaina e le Au Toeaina susuga i A'oa'o ina ia fai o latou faletua ae le'i'u mai le Kolisi. O le amataga o le tausaga na faataunuu ai faaipoipoga a nisi A'oa'o. O le a'oa'o faai'usage ia Meafou Ah Ching na faaipoipo atu ia Sapiai Auelua i le EFKS Lepa na faapaia e le susuga Iosefa Uilelea FT. O le faaiusage ia Talolua Saia na faaipoipo ma Nessa Anau i le EFKS Meadow Heights na ta'ita'i e Fiaalua'e Tiata FS. O le isi a'oa'o tausaga fa o Peniata Laulau na faatasia ma Gloria Taimo i le EFKS Pata Falelatai e Caesar Samuelu FT. O le faaiusage o Asoiva Saofai na faaipoipo ma May Sailusi i le EFKS Gautavai e le susuga Leaso Tupai FT. O Tiafau Vaega ma Lucy Nanai na faapaia lo la'ua aiga i le EFKS Te Atatu e le susuga Aleki Nanai FT. O Samuelu Afutiti ma Mane Fatu na faapaia e le susuga Andy Leavasa FT i le EFKS Dominguez, Kalefonia Amerika. Ma le a'oa'o lagolago ia Loia Fiu Kolia na faaipoipo ma Easterakesa Mote i le EFKS Vaiee e le susuga Kereta Fuafiva FT. Ia manuia aiga fou ma ia saunia mo le galuega. O polokalame eseese e i ai A'oa'oga, Tapuaiga, Taaloga, Mafutaga Faletua, Aoga Aso Sa, Atina'e Manu Papalagi, Maluapapa Literacy & Maluapapa Kindy ma le tele o isi, na ootoo e le afioga i le Alii Pule ua i'u ma le manuia i le alofa o le Atua. E faafetaia ai le tapuaiga a le Ekalesia ma Aiga a o alofaiva le Kolisi i ana feau. O faailoga taualoa o le tausaga 2020: Yr 1: Faletua - Toese Tautalagia, A'oa'o - Saleaula Reti. Yr 2: Faletua - Faalaniga Tanielu, A'oa'o - Filifili Malifa (Dip), Fraser Tauaivale (BTheo), Faafetai Korua (BD Hons). Yr 3: Faletua - Amiaifolau Luatua, A'oa'o - Tafatolu Tapaleao (BTheo), Isaako Iose (BD Hon), Yr 4: Faletua - Caroline Tuiluga, A'oa'o - Peniata Laulau (Dip), Nuufaigata Peleiupu/Tafatolu Bentley (BTheo), Fenika Faalave/Fetu Fetu (Trophy, BD Hons).

MAOTA GALUEGA EFKS PETANIA-FOU, FALEATA.

O Lona Amataga:

O le Tofiga a le Pulega Faleata Sisifo na fautuaina ai e le susuga Toeaina ia Faauuga Matautia FT ma le Pulega, le susuga ia Enoka Pouniu FS ma le faletua ia Lila (Faifeau Nofo Aiga i Toamua) ina ia faamaopoopo tagata ma amata sauniga lotu i Toamua-uta le nofoaga o la'ua nonofo ai. Na fai le uluai sauniga lotu i le Aso Sa 5 Me 2019 @ 11.00am, na ta'ita'i e le susuga i le faifeau o Enoka Pouniu FS i lo la'ua maota, faatasi ma aiga e to'a 4 na amata ai lenei Aulotu. Sa auai le susuga Kerisiano Soti FT (Penisione), susuga Eletise Suluvala FS (EFKS Toamua, Failautusi Mtg Faleata) faapea le mamalu o le afioaga ma le Ekalesia EFKS Toamua. O le Aso Sa 14 Iulai 2019 na faia ai le Sauniga e tatala aloaia ai le Ekalesia fou, na ta'ita'iina e le susuga Faau'uga Mata'utia FT, sa auai le Failautusi o le Pulega, Tautua Aurelio FS (EFKS Vaigaga). Ua faavae le EFKS Petania-fou lona igoa, ua tofia aloaia le susuga Enoka ma Lila Pouniu, la te tausia le Ekalesia fou i le tulaga Faamisionare. O Petania o le igoa lea o le auala a le malo (Petania Street) o loo i ai le maota sa fai ai sauniga lotu, a o le nofoaga foi o i ai le fanua e 'afa 'eka na faatau ma ua fausia ai nei le Maota o le Galuega ma fai ai tapuaiga i le Atua. A o le igoa foi lenei o le nuu e tu mamao i uta, le nuu o Lasalo, Maria ma Mareta sa masani ona api ai Iesu ma ona soo, na uia foi i Lana malaga i Ierusalem e oo ai i le satauro. Na manatu ai le susuga Enoka ua talafeagai ona faaigoa lenei Aulotu fou i le Pulega Faleata Sisifo o le Matagaluega Faleata i le Ekalesia Faapotopotoga Kerisiano Samoa, ia Petania-fou.

O Lana Ulua'i Galuega:

O fautuaga a le susuga i le Toeaina ma le Pulega na fai meafaalogo i ai le susuga i le faifeau ma le Aulotu i lona tau amatalia mai. O se tasi o fautuaga ina ia saili se fanua mautu ma fausia se maota talafeagai mo sauniga lotu ona o loo faia i le maota/aiga o le faifeau misionare. O le tausaga nei 2020 ua maua ai le fanua e 'afa 'eka ua resitara i le igoa o le EFKS Petania-fou; o le fanua o loo fesaga'i lava ma le fanua o le faifeau i Petania Street. O se nofoaga e ui ina o loo si'omia e isi lotu - 8 AOG, 2 Aso Fitu, 1 Metotisi Tutoatasi, ae o i ai foi ma le tele o tagata lotu EFKS e ala ai ona oo mai nei ua 12 Matafale o le EFKS Petania-fou aofia ai le A'oa'o Fesoasoani e toatasi. Na a'e le tofa i le faifeau ma i latou nei ina ia fausia loa se maota o le galuega ma faatino ai latou

tapuaiga e faatali ai se Malumalu tapua'i. Sa fai sailiga tupe e ala i Bingo, Lūlū, Tausala, Atina'e, Faatauga Fale'aiga a Tina, Autalavou ma le Aoga Aso Sa. A o le Fa'aaliga Tausala tele sa faia i le Hall EFKS Toamua na maua ai le \$20,000+, na ave ai loa le \$15,000 e tiposi i le Bluebird Lumber & Hardware ae talosaga le aitalafu o oloa mo le galuega. O le ata o le maota na tusia e le afioga tiakono ia Ale Kaio TK (matafale), a o le afioga ia Tupa'i Auva'a Tauiliili mai Foailalo ma Faleula le Matua o Faiva ma le Falefa o le Aiga Salemalama sa fausia le galuega; e 8 vaiaso na fausia ai le maota e 18 mita x 10 mita lona tele. O piliki o le galuega na ofoina e le afioga Ale Vena, o nisi laupapa na ofoina e Taualeo'o Fono ma Maiava Gafa (o Matafale o le Aulotu). E \$43,000 + \$5,160 tului + isi le aitalafu na talosagaina, \$63,160 le tupe atoa na alu i le Bluebird; \$14,459.90 le tau o isi oloa mai isi fale e le maua i le BBL, o le tau atoa o le galuega e \$79,105.54. Malo le galulue.

Ua Faapa'ia le Maota o le Galuega:

O le Toeaina o le Pulega Faleata Sisifo/KMTA Matagaluega Faleata, susuga Faauuga Mata'utia FT na ta'ita'i le sauniga lotu e faapa'ia ai le Maota o le Galuega i le Aso Faraile 11 Tesema 2020. Na muamua alalua le lipine e le afioga Faletua o le Taitaifono Fono Tele, Susana Tunumoso Iosia e tatala aloaia ai le maota. Ona tauaao atu lea o Ki o le maota e le afioga Matuaofaiva, ma ulufale atu ai le mamalu o le faapotopotoga mo le sauniga lotu. O le susuga Misipalauni Faatau FT (EFKS Ketesemane-fou) le toeaina o le Pulega Faleata Sasa'e na saunia Tatalo o le tapuaiga sa auai le Pulega Faleata Sisifo, le afioga Mataia Apisaloma TT, le failautusi o le Pulega Faleata Sasa'e susuga Amosa Reupena FS (EFKS Vaimoso) faapea le mamalu o tamalii ma failauga ia Ulu ma Ale o le afioaga o Toamua. Na valaaulia le afioga Taitaifono Fono Tele susuga Tunumoso Soliola Iosia FT e molimau, faafetai ma faamanuia e tusa o le soifua faatuatua ma le ola tautua faamalolosi mo le Atua e ala i lenei Aulotu fou o Petania-fou, i le susuga faifeau misionare ma le faletua, le aufaigaluega ma le nofo a matafale, faapea le susuga Toeaina ma le Pulega mo le faatofalaiga paia ua tu ai lenei Aulotu fou, ae maise le tapuaiga ma lagolago i auala eseese. Ona ia tauaao atu lea o le meaalofo \$10,000 a le EFKS Aoa e tusa o lana Iugafono tumau mo galuega faatino faapenei. Na faai'u le aso i taumafataga, fiafia ma fa'aaloaloga faa- EFKS ua

AU FAILAUGA O LE SULU SAMOA 2021

<u>MASINA</u>	<u>SUAFA</u>	<u>AULOTU</u>	<u>MATAGALUEGA</u>
1. IANUARI	IETI TOFAEONO FS	SAUANO	APIA SASA'E
2. FEPUARI	IAKINA ALEFAIO FS	SAANAPU-TAI	FALEALILI SAFATA SIUMU
3. MATI	MOTUGA MATAGI FS	TANUMALALA	AANA
4. APERILA	FARAIMO TI'ITI'I FS	UTUALII	MALUA
5. ME	ATA MILO FS	OTAHUHU	MANUKAU
6. IUNI	ELISAIA KOLIA FS	MATAUTU-UTA	APIA
7. IULAI	OSA NANAI FS	CABOOLTURE	KUINISELANI
8. AOKUSO	TESIMETA AFAMASAGA FS	FATAUSI	FAASALELEAGA
9. SETEMA	UIKILIFI VAIFALE FS	ROOTYHILL	NIUSAUELESE I SISIFO
10. OKETOPA	ESEKIA PENEUETA FS	LEPEA	FALEATA
11. NOVEMA	FUAMAILA SOA JR. FS	WAIMANALO	HAWAII
12. TESEMA	LEAUMA FALETOESE FS	FALEALUPO-UTA	ITU O TANE

masani ai, o taulaga osi i le Atua e ala i le au mau tofi o le Ekalesia, o Toeaiina ma Faifeau o le aufaigaluega tofofi a le Atua, faapea le mamalu faalemalo ma le atunuu sa auai. Faafetai le fa'aaloalo, malo le tautua ma faaea Ekalesia; ia faamanuia atu le Atua ma ia tupu ma ola le faatuatua o le Ekalesia fou.

O le Faamoemoe i le Lumana'i:

O le susuga Enoka Pouniu o le lupe faalele a le EFKS Auala, Itu o Tane, a o le faletua ia Lila e mai Toamua; na la'ua i'u mai Malua i le 2009, ona galulue lea o le faifeau e faia'oga i le Kolisi Malua fou a o le faletua i le Matagaluega A'oa'oga Kerisiano ae le'i sui i le SQA. Na faae'le lo la'ua tofi Faifeau Samoa i le 2012, ma o loo faatali nei le isi laasaga tāua o le galuega - o le osiga lea o le latou feagaiga i le aso 3 Fepuari 2021, pe a aulia i le alofa o le Atua. Pe afai e taunuu lea faamoemoe, ona suia lea o le EFKS Petania-fou mai le tulaga Faamisionare o i ai nei, e avea ma se tasi o Aulotu māvae o le EFKS i le Pulega Faleata Sisifo o le Matagaluega Faleata. Ae mo le taimi nei, ia faamanuia le Atua i le galuega faamisionare ma le sailiga o agaga ia faaolaina e ala i le salamō ma faatuatua ia Iesu Keriso. Ia outou loto tetele Enoka ma Lila ma le Ekalesia, *auā tou te faatasi pea ma le Alii e ana le galuega i aso uma e oo lava i le gataaga o le lalolagi*. Malo le saili malo mo le Atua ma le Tala Lelei ia Iesu Keriso. Ia manuia le galuega, ma ia manuia le Kerisimasi ma le Tausaga Fou!! (*Ata o le Faifeau & Faletua & Maota itulau 16*).

O A TATOU MEA'AI TATAU MA LE ASO

O LE UPU UA AVEA MA TAGATA:

KERISIMASI MA IOANE – 1 SA I LE AMATAGA LE UPU

Aso Sa, 20 Tesema 2020

Faailoa mai le alofa o le Atua

Faitau 1 Ioane 4: 7-19

“O le mea lava lenei ua fa’alia mai ai le alofa o le Atua ia te i tatou, ina ua auina mai e le Atua lona Alo e toatasi i le lalolagi, ina ia tatou ola ia te Ia.”

O le Kerisimasi o le taimi tatou te mafaufau ai, e lē o ā ni mea tatou te avatu i le Atua, ae o le ā le mea ua aumaia e le Atua mo i tatou. O Ioane, i lana Evagelia ma ana Tusi faa-aposetolo, ua na tusia i le auala e sili ona faaosofia lagona, le uiga o lena mea mo i tatou: ua mafai ona tatou alolofa atu auā ua muamua ona alofa mai le Atua. Ua mafai ona tatou alolofa i le Atua auā ua uma ona Ia faailoa mai o Ia ia i tatou, o se tasi e mafai ma e iloa ona alofa. E lē o Ia o se Atua e mamao ese, pe faigatā ona malamalama i ai, pe lē mafaamatalatalaina. Ua Ia faaliliuina o Ia i se foliga, se gagana, tatou te malamalama ai, auā o le mea e tasi e manino uma i ai tagata soifua, o le faapefea ona avea ma tagata ola. Peitai i le taimi lava lea e tasi, o lenei tagata ola, lenei Pepe na fanau mai i Peteleema, e tumau pea Ia o le Atua. O le amio a le tagata o Iesu e iloa ai pe faapefea le amio a le Atua. Ma e talu ai ona ua tatou iloa e alofa mai le Atua ia i tatou, o le ala lea o lo tatou maua o le mafanafana ma lototele e alolofa ai i isi tagata, *“¹²ia outou fealofani, pei ona ou alofa atu ia te outou.”* Ioa.15. Mo le isi 11 aso seia aulia le faai’uga o le tausaga, o le a tatou taumamafā ma tausasami ai i le gasegasa faaleagaga a Ioane, e faasino i suiga eseese e mafai e le alofa o le Atua, ona faia i o tatou olaga.

Aso Gafua, 21 Tesema 2020

Malamalama ma le Pouliuli

Faitau Ioane 1:1-9

“⁵Ua pupula mai foi le malamalama i le pouliuli, a e le’i manumalo i ai le pouliuli.”

Ao o’u nofo ai i Aferika, sa ou lē manofonofa lelei i le fai o le Kerisimasi i le ogatotonu o le tau

mafanafana. Ou te sau mai le itu i matu, o le Kerisimasi o le taimi lea o moli i le tau aupito pogisā o le tausaga: o moliga’o i autafa o le fale ma fuifui mōlī i luga o le laau Kerisimasi i le faamalama e iloa atu ai le auala. E leai se tasi na te iloa tonu po o anafea na fanau mai ai Iesu; o le aso 25 Tesema o se aso na soona filifili taumate e tagata o loo nonofo i le itu i matu. Ae o fea lava tatou te nonofo ai, o aafiaga o le malamalama i le pouliuli e tumau pea o se tasi o autū sili i le Evagelia a Ioane. O loo matuā faatumulia le lalolagi i le pogisā: o le pogisā o le gasegase faalemafaufau ae maise lava i faanoanoaga; o le pogisā o le fefe; pogisā o faiga sauā ma agaleagamo i latou e afaina faatasi ma i latou e faia; o le pogisā o le leai o se faamoemoe. E lē uma le lisi faasolo. Peitai i totonu o nei tulaga uma o loo i ai le malamalama o le Atua, e susulu atu pea e ui ina o le pouliuli, e avatu i tagata le faamoemoe ola ma ta’ita’i i latou i totonu o le pogisa. *“¹²Auā o le pouliuli e lē pouliuli lava lea ia te oe; e malamalama le po pei o le ao; e tusa lava ia te oe le pouliuli ma le malamalama.”* Sala.139. I talosaga ma le faatinoga o le lagolagosua, e mafai e le Atua ona fa’aogā i tatou ina ia faatumauina le susulu atu o Lona malamalama i le pogisā e lē mafai ona manumalo ai.

† Le Alii e, faasino mai pe faapefea ona matou fesoasoani, e ala i a matou tatalo, o upu ma faatinoga, e faatumauina ai le susulu atu o lou malamalama i le pouliuli. Amene.

Mo Mafaufauga Faaopoopo: Ia mafaufau i se nofoaga o le pogisa i le lalolagi. E faapefea ona oulua galulue ma le Atua ina ia susulu atu i ai le malamalama?

Aso Lua, 22 Tesema 2020

Fa’ailoaina o le Atua

Faitau: Ioane 1: 10-18

“¹⁸E le’i vaaia lava le Atua e se tasi; o le Alo e toatasi o loo i le fatafata o le Tamā, o ia ua na fa’ailoa mai o ia.”

Mo a’u, faapea isi tagata e toatele, o le faitauina o le mataupu muamua o le Evagelia a Ioane i le Sauniga o le vaeluāpō a o lumana’i le Aso Kerisimasi, o le

amataga tonu lea o le Kerisimasi. E lē o le faatauina ma afifi o meaalofa, o le gagesega o taumafa, o le teuteuina o laau Kerisimasi, o le asiasi ia Santa i le faleoloa, o le tautauina o totigi po o le tuuina i fafo o seevae mo Sagato Nikolao. E moni le amataga o le Kerisimasi ina ua tatou faatasia ma o tatou aiga Kerisiano e faalogo i upu, *“¹⁴Ua liu tino tagata le Upu, sa mau foi o ia ma i tatou.”* O se tasi faaliliuga ma le faitauga o le fuaiupu 18 e faapea, *‘O ia le Alo e toatasi’* nai lo le *‘o le Atua le Alo e toatasi’*. O lo’u manatu toatasi o lenei faaliliuga e sili atu ona manino, peitai o nei faitauga e lua o loo malamalama lelei ai le tala moni, ia Iesu le tagata, le kamuta mai Nasareta, ua tatou iloa lelei ai pe faape’i le Atua. Ina ua fai e le Atua lona tino tagata ma soifua, a’oa’o ma maliu, o ia lava lea, i se faaupuga faigofie. Tatou te vaavaai ia Iesu ma iloa ai le Atua. Tatou te faitau le tala i ana galuega i Evagelia ma iloa ai, e faapea ona gaioi, tautala ma mafaufau le Atua. Ma afai o tatou o se vaega o se faapotopotoga Kerisiano, e fai i tatou ma sui o le auai o Keriso i totonu o le lalolagi, ma faapea foi ona fai lo tatou sao, e faailoa atu le Atua e ala i lona Alo e toatasi.

†Le Tama e, fesoasoani mai ia matou iloa lou Alo ina ia matou iloa manino atili ai lau Afio. Amene.

Mo Mafaufauga Faaopoopo: O a mea o loo ta’u atu e Iesu ia te oe faasino i le Atua?

Aso Lulu, 23 Tesema 2020

Talitonu ia Iesu

Faitau Ioane 2:13 – 22

“²²Na tu mai o ia nai e ua oti ona manatua ai lea o ona soo ua na fetalai mai lenei upu ia te i latou; ona latou talitonu lea i le Tusi, ma le fetalaiga a Iesu ua ia fetalai mai ai.”

O le malumalu i Ierusalemalele ogatotonu o le tapuaiga a Iutaia. O le nofoaga e ofoina a’e ai talosaga i le Atua i aso taitasi, e o a’e i ai tagata faimalaga i tausamiga tetele, e mulumulu’aufoe ai tagata ma o latou sootaga ma le Atua e ala i osiga taulaga o le salamō po o taulaga o le faafetai. O le sunako faalotoifale le nofoaga mo tatalo ma a’oa’oga i le vaiasosā; e na o le malumalu e osi ma ofoina a’e ai taulaga tāua. I le tuufaasolo mai o tausaga, ua faatuputeleina pisinisi e saunia manu eseese e osi ai taulaga, faapea tupe siliva e faatau ma totogi ai, o tupe e leai se ata o se atua faapaupau o i ai. O nei

feafaatauaiga e pisapisaō ma pisi solo ai faa-maketi le malumalu ma faaleagaina ai le si’osi’omaga mo tatalo e tatau ona i ai. O le ata o le mea na tupu i le faitauga o lenei aso, o loo fa’aalia ai Iesu o tiga i le to’atama’i, na ia otegia ma fai le sasa. Peita’i atonu, e pei ona sa faia e nisi perofeta na muamua, o loo ia faatinoina ma faailoa atu se mea moni. O osiga taulaga ma ona faiga faavae ua oo mai le taimi ua uma ai lona aogā ma lona tāua. Ua lē toe manaomia e tagata ni osiga taulaga e fesooteai ai ma le Atua. O Iesu lava ia le ala i le Atua. O le talitonu i fetalaiga ma a’oa’oga a Iesu, i ana galuega ma faatinoga, e vaai i lona maliu ma lona toetu o le taulaga mulimuli lea e suia ai faiga taulaga muamua, ina ia lē toe aogā se malumalu ma ni osiga taulaga fai soo – o le uiga moni lea o ana faatinoga ma gaiioiga o loo fai i totonu o le malumalu.

†Faafetai le Alii e, ina ua avea le taulaga tutasi na faia i lou Alo, ua mafai ai ona matou o atu i lau Afio. Amene.

Mo Mafaufauga Faaopoopo: O a ni auala ua avea ai le soifua ma le maliu o Iesu, e faalēaogāina ma lē toe mana’omia ai osiga taulaga o le malumalu?

Aso Tofi, 24 Tesema 2020

Ia soifua le Atua ia te oe

Faitau – Ioane 3:27-36

“³⁰E ao ona tupu pea o ia; peitai a’u nei, e tauāu ina itiiti o a’u.”

O lona soifua ai i totonu o le vao i tuāmaota o aai, e la’ei i pa’u o manu, taumafa i le meli vao ma sē akerise, ma sasao faa-afi ana lauga – e pei lava Ioane le Papatiso e fai sina sala’ese mai o tatou mafaufauga faaonaponei. Peita’i e le’i sala ‘ese o ia i auga tupulaga o ona aso. Sa tula’i mai Ioane ma galue e pei lava o isi auga perofeta Isaraelu na muamua atu ia te ia. Na ia faataunuina le tofi na ulua’i vaiaia e Isaia, e sauni le ala mo le Alii. Ae na iloa lelei e Ioane o ia ua na o se ave feau, o le leo e faailoa atu le afio mai o le Tupu. E tusa ma le Evagelia a Ioane (1:31) sa leai sina iloa e le Papatiso po o ai o loo mulimuli mai ia te ia; mata sa faate’ia o ia, atonu na matuā segia lona maui ina ua iloa mulimuli ane, o lē o loo ia faailoa atu o lona lava tausoga o Iesu mai Nasareta, le kamuta nofo fale. Peita’i e le’i pine ae amata ona faase’e tuāgalu Ioane ina ia faasili Iesu, ma faataga ai ona soo e mulimuli atu ia Iesu. Ina ua amata le galuega a Iesu ma ua faa-autū ia te Ia le talaiga, sa talia lelei e Ioane le tulaga o le a uma lona sao ma le

aogā o lona tofi – ma e faafiafiaina o ia ua uma ona fai le tiute na tofia i ai o ia e le Atua (f.29). Tatou te faasoa ma le galuega a Ioane o le saunia o tagata ia mulimuli ia Iesu. Ae a feiloa'i loa ma maua e tagata Iesu, e ao ona tatou la'a teisi i tua ia faaitiitia i tatou, ina ia faasilisili, ia pule ma ta'ita'i le Atua. A o tatou avanoa pea e fesoasoani ma faamalosia'u, e ao ona tatou tuu i le Atua e fai Lana galuega ma ta'ita'i tagata i ana auala e matuā ese mai ia tatou ala. O i tatou o ave feau; o le Pepe i le pusa vaovao i le Falemanu o Ia le feau autū, le Upu a le Atua.

†Fesoasoani mai le Alii e, ia matou saunia le ala mo tagata e feiloa'i ma lau Afio, ma ia matou maua le loto lelei e tuu atu ai i latou faatasi ma oe. Amene.

Mafaufauga Faaopoopo: O a ni auala e mafai ai ona e faaitiitia ina ia faatupu tele le Atua i lou olaga?

Aso Faraile, 25 Tesema (Aso Kerisimasi)
Ua afio mai le malamalama i le lalolagi

Faitau: Ioane 3:16-21

“¹⁷Auā e le'i auina mai e le Atua lona Atalii i le lalolagi ina ia faamasino i le lalolagi, a ia faaolaina le lalolagi ia te ia.”

O le tusitala o le Kenese 6: *“¹³Ua fetalai atu le Atua ia Noa, 'faauta foi, o a'u lava, ou te faaumatia i latou atoa ma le lalolagi'.”* o loo fa'aaia ai le Atua ua uma lona onosa'i i le lalolagi o tagata. O tane ma fafine ua mata'utia le tulaga ua oo i ai lo latou lē usiusita'i, le ola vevesi ma faatupu faalavelave; o mea uma latou te fai o mea pi'opi'o ma inosia, na ala ai ona fafano e le Atua ona aao ia te i latou ma auina ifo le lolo e faaumatia ai (vaganā Noa le tagata amio sa'o ma lona aiga). O le mea moni lava e lē malolo le Atua i Lona fesoasoani i ona tagata ina ia lelei a latou amio. Peita'i o le aotelega latou te lē a'oa'oina le feau. O le ala lea ua matuā afio mai ai lava o Ia e ala i Lona Alo o Iesu. Peitai ua lē afio mai le Atua e pei o le faamasino sauā o Kenese. Ua fa'aali mai e Iesu i lona soifua, lona maliu ma lona toetu, pe faapefea tonu le Atua: o le faia ma sootaga na te manaomia ma tagata; o le mamao ma le umi e oo i ai lona taumafai e fesoasoani ina ia ausia e tagata lenei tulaga. E lē ma'imaui e Iesu le tele o ona taimi e sasa'a atu ai lona faamasinoina o tagata, e ta'usalaina ma faamalala i a latou agasala ma fetu'u o latou vaivaiga ma toilalo. O Iesu e tau

lava ina i ai o Ia. O Ia o le malamalama, e susulu atu i se lalolagi ua liu pouliuli. O lona malamalama ua faia i tatou ia vaavaai ifo i o tatou lava tagata ma faamasino ia i tatou, ia liliu ese mai le pouliuli ma iloa le olioli o le ola i totonu o le malamalama o le Atua auai mai. O le Aso Kerisimasi ua na ofoina mai ia i tatou le avanoa e toe faataga ai le malamalama e susulu mai i o tatou olaga, ia talia le tiga o le iloaina o tatou tagata moni, ae toe maumautaia ai foi le ituaiga tagata na fuafuaina mo tatou, o le ola lea i le malamalama ua aumaia e Iesu e ala i lona lava faapei o Ia: o le Alo o le Atua ua afio mai e faaola i tatou, ae lē fafano ona aao mai ia i tatou.

†Le Tama Meamea paia o Petelema e, Iesu le Alo o le Atua, ia e fanau i totonu o i matou i le aso nei, ina ia mafai ona matou savavali i lou malamalama. Amene.

Mafaufauga Atili: O le a le uiga o le ola i le malamalama, ia te oe?

Aso Toonai, 26 Tesema 2020

Te'a ese mai le oti i le ola

Faitau: Ioane 5:19-27

“²⁴E moni, e moni, ou te fai atu ia te outou, o lē faalogo mai i la'u upu, ma talitonu ia te ia na auina mai a'u, ua ia te ia le ola faavavau; e lē oo foi o ia i le faamasinoga, a ua oo atu o ia i le ola, sa i le oti.”

O nai tausaga talu ai sa ou faitau ai i le tusi a Pili Palaisone, *O Sina Tala Puupuu Toe Lava o Mea Uma*. Sa ou fiafia i ai, ae maise i le vaega faasino i fetu, o le vanimonimo ma le tau. Peitai i le tusi atoa o loo i ai se pu – o le pu foliga i le Atua. O loo ta'ua soo e Palaisone le ofoofogia sa i ai le iunivesi, ae lē mafai ona ia ta'ua pe faapefea ona amata mai. Afai sa i ai se Pa Tele, o ai sa ia foafoaina elemeni sa pa? Pe afai e toe foi i tua i le mamao e gata mai ai le saienisi i le taimi nei, ona fetau le o Palaisone ma se avanoa. Pe afai tatou te talitonu ma faatuatua i Le na ia auina mai Iesu i le lalolagi, ona tatou feiloai lea ma le Atua, e ui ina misiterio pea le faapefea ona faia e le Atua o le lalolagi. O le Atua e atamai ma sagatonu ai lo tatou i ai. O le Atua na te silafia lelei le tagata na Ia faia, tusa lava po o le ā le faapogisaina e le agasala. O le Atua o loo i ai iina e fesoasoani mai ia tatou manumalo i mea leaga o faalavelaveina lo tatou ave ma tagata e tusa ona foafoaina ma mamauina ai i tatou. Ia fesoasoani mai ia ave i tatou ma tagata

atoatoa. Ua fa'aali mai e Iesu le auala e avea ai ma tagata atoatoa e tusa ma le mamamu na faia ai e le Atua. E mafai ona tatou alolofa e pei ona sa ia alofa. E mafai ona tatou faasoa ma ola faatasi ma puapuaga o le lalolagi e pei ona sa soifua ai o Ia. E mafai ona tatou ola faavavau e pei ona sa faia e Iesu. Tau lava ina tatou talitonu ia te Ia, talitonu i le Atua, ina ia tautala i le upu moni, ma e pei ona fetalai Iesu i le Evagelia a Ioane 8: *"³²E iloa foi e outou le mea moni, e tuu sa'oloto foi outou e le upu moni."*

†Iesu e, ua ou talitonu o ia te oe le ola, o le ola foi o le malamalama lea o tagata uma. Faafetai ina ua mafai ona ou faasoaina lena ola. Amene.

Mafaufauga Atili: O le a le uiga o le te'a ese mai le oti i le ola ia te oe?

Vaiasosa 27 Tesema 2020-2 Ianuari 2021

OLE UPU UAAVEA MA TAGATA:
KERISIMASI MA IOANE – 2
MEAALOFA SILISILIALE ATUA

Aso Sa, 27 Tesema

Iloaina

Faitau: Ioane 10:11-18

"¹⁴O a'u nei o le leoleo mamoe lelei; ua ou iloa a'u mamoe, ua iloa foi a'u e a'u mamoe."

O le ata o ta'ita'i o Isaraelu e faatusaina i leoleo mamoe o se ata faatusa lauiloa i le Feagaiga Tuai. E faatusaina foi le Atua o le Leoleo mamoe o Lona nuu o Isaraelu. O le upu 'leoleo mamoe' na te momoli mai le ata o le tausiga, faafailele ma le matuā tago faamaoni i ai. Peitai, e pei ona fa'aalia soo e perofeta o le Feagaiga Tuai, o Isaraelu ua faamalaiaina e ta'ita'i leaga, o leoleo mamoe faatamala o e manatu māmā ma ta'ita'i sesē a latou lafu. Peitai o Iesu le Leoleo mamoe lelei, o le ituaiga leoleo mamoe e sili ona lelei. Na te tausi lelei i ana mamoe, na te silafia pe afai e sē se mamoe ona Ia saili lea, e nofo sauni o ia e oti mo le puipuiga o Lana lafu. Ae silisili ai, e silafia e Ia ana mamoe.

Na te silafia o latou foliga, o latou tamali'i'aga ma latou amio faaletonuga, na te silafia le mamoe e faigofie ona sē, e silafia le itu e maua ai le vao lelei, ae o fea foi e i ai manu feai e lamatia ai le lafu. E iloa lelei foi o Ia e ana mamoe. Latou te iloa o Ia le leoleo mamoe lelei, na te tausi ma leoleo faalelei ia te i latou,

e puipui mai fili e lamatia ai latou, e ta'ita'i i latou i le ala sa'o aga'i i fanua saogalemu e i ai vao lelei. O se ata matagofie tele lena o lo tatou so'otaga ma Iesu. O i tatou uma o Lana lafu vaganā ua mana'o le tagata e alu ese ma le loto i ai, ae toatele latou te lē iloa lena mea, e lē iloa foi le Atua. Ae afai tatou te iloa le Leoleo Mamoe, e mafai ona tatou talitonu na te tausia i tatou, e aafia o Ia i o tatou olaga, ina ia ta'ita'i i tatou i le ala sa'o. Maeu lena mea alofa!

†O le Alii o lo'u leoleo mamoe o Ia, e leai se mea ou te mativa ai, e moni e mulimuli mai ia te a'u le agalelei ma le alofa i aso uma o lo'u ola. Amene.

Aso Gafua, 28 Tesema 2020

Lavea'iina ae lē o le faamasinoina.

Faitau Ioane 12:44 – 50

"⁴⁷auā ou te le'i sau e faamasino i le lalolagi, a ia ou faaolaina le lalolagi."

A o o'u nofo i Ioanasepeka i le 1980s, o la'u savaliga e galue i se a'oga faafaifeau i le kolisi fa'aauau, ou te sopo'ia ai le 'Olo Falepuipui. O lena toese e taofia ai tagata e le'i faia o latou faamasinoga ma e le'i faasalaina, o se nofoaga sa lauiloa i le leaga o le vaaiga o pagota. O le aufaigaluega e peisea'i e faatamala tele i le mea e tuu ai fasimoli susū, o le ala lea o le toatele o pagota e sese'e ai ma pa'u'ū ifo ai i fasitepu ma'a ma maliliu ai. O nisi faigaluega i le 'Olo e matuā amio leaga, ma e toatele i latou e faitioina ma faamasinosinoina. Peitai afai ou te savali atu ma sopoia, ou te valaau i le Atua ina ia faamagalo i latou. Pe afai o se mea matuā ese lena o le faamanuia o isi tagata, e lē na o se auala mafanafana lea ia latou lagonaina ai le fiafia ae ia tutupu ai ni mea matagofie i o latou olaga. O le fai i le Atua e faamanuia se isi tagata e pei lava o le faalālā atu i ai o le ituaiga pelu e masani ona vaaia i ata tifaga - o pelu pei ni 'avemōlī susulu e mafai ona ati i le tino o le tagata. O le faamanuia atu o se tagata o le faasusulu atu lea o 'avemōlī ia i latou e auala atu ai le malamalama ma le paoa o le Atua i totonu ia te i latou. O le faamanuia atu i isi tagata, e sili atu lea nai lo le faamasinoina o i latou, auā o le faamanuia atu o le a fesoasoani lea i le Atua e fai le galuega o Lana faaolataga, ina ia lavea'iina e oo lava i e amioleaga mai a latou agasala. O le faamanuia a le Atua e mafai ona suia ai olaga o tagata, e suia mai tulaga leaga o loo i ai ia avea ma lelei. Ia fa'aogā le malosiaga lelei o le faamanuia mo i latou e manaomia tonu, galulue faatasi ma le

Atua e lavea’i le lalolagi, ae soia le maumauina le malosi ma le ‘ea e faamasino ai fua isi tagata.

†Le Atua e, ia avea le mana o Lau faamanuia e suia ma faaolaina ai i matou uma. Amene.

Mo Mafauauga Faaopoopo: Ia mafaufau i se isi o manaomia le faamanuia a le Atua. Valaau i le Atua ia alofa faamanuia i latou, ma ia taofia i latou i au tatalo a o faasusulu i ai e le Atua Lona malamalama i totonu o i latou.

Aso Lua, 29 Tesema 2020

Ala, Upu Moni, Ola

Faitau Ioane 14:1-7

“⁶Ua fetalai atu Iesu ia te ia, “O a’u nei le ala, ma le upu moni, ma le ola; e lē alu atu lava se tasi i le Tamā, pe a lē ui mai ia te a’u. ⁷Ana iloa e outou o a’u, po ua iloa foi e outou lo’u Tamā.”

A o faasolo ina tatou iloa Iesu, tatou te maitauina ai o loo tatou o i se malaga. E faasino mai e Iesu le auala tatou te ola a’e ai i se sootaga sa’o ma le Atua, ae lē na o Lona faasino mai o le auala sa’o; o Ia lava le auala. O le aumaia o Iesu i totonu o tatou olaga e a’oa’oina ai tatou e mafaufau faatasi ma Lona mafaufau, e faatino e pei ona sa Ia faia, e alofa e pei ona sa Ia alofa. O Iesu ua na faasino mai ia i tatou le upu moni faasino i le Atua; o Ia o le upu moni a le Atua i le tino tagata. Ma na te faia i tatou ia iloga ona matuā ola: *“¹⁰ua ou sau ina ia latou maua le ola, ia maua atili ai lava.” Ioa.10.* Ua faailoa mai e Iesu ia i tatou le Tamā: *“⁹O lē ua vaai mai ia te a’u, ua vaai o ia i le Tamā.” Ioa.14.* Pe afai tatou te faitau ia Iesu a o Ia faamālōlō, a’oa’o, alofa atu, faamagalo, faamasino, puapuagatia ma faatoilalo le oti ma le agasala, ma talitonu o loo Ia soifua i le upu moni, tatou te iloa ai o loo faapea foi ona faia e le Tamā. Ua fa’aali mai e Iesu ia i tatou le Tamā, ma e na o Ia lava e mafai ai ona tatou iloa le alofa silisili o le Tamā ia te i tatou. O le TFT leni, le Tulaga Faatauina atu Tulaga ese, o le faa Kerisiano. E ala ia Iesu, ua mafai ai ona tatou iloa le Atua e lē o se Atua tauanau mai tatou te taofiofi i la tatou itu ma osiga taulaga – e ui ina o le a Ia tauanau mai tatou. E ala ia Iesu, ua tatou iloa ai le Atua e lē se Atua mamao ese e faagaioi le lalolagi ona toe tuumuli ese lea ae tuu le tagata e sasao ai lona faaleagamea. E ala ia Iesu, ua

tatou iloa ai o le Atua o tatou mulimuli ma tapua’i i ai o se Atua e atoatoa e alofa moni ia i tatou taitoatasi. † ‘Le alofa silisili, e paia, faatonu mai lo’u loto, lo’u ola, lo’u tagata atoa.’ Amen.

Mafauauga faaopoopo: O le a le uiga o le tatou avea o le Atua e fai mo tatou Tamā e atoatoa ma alofa?

Aso Lulu, 30 Tesema 2020

O e ua manumalo i le lalolagi

Faitau: I Ioane 5:1-5.

“⁵O ai ea se na te manumalo i le lalolagi, pe afai e le o lē talitonu, o Iesu o le Alo lava ia o le Atua.”

O le lalolagi e mafai ona avea o se nofoaga taufaafefe. E tutupu mea mata’utia i tagata. E faafefe i latou e mea na latou vaaia pe na latou oo i ai. I le vaai faaletagata, e foliga peisea’i ua leiloloa mea uma: o le aiga, o galuega e faamoemoe i ai, o le nuu ma le atunuu. Po o le tauivi ma ma’i eseese ua latou aveese uma le olaga masani e tataua ona i ai. O i tatou uma ua fetai’i ma ituaiga amio leaga eseese a tagata, ma ua valaauina ina ia tali atu i ai i le alofa, lototele ma le usitai.

Sa tatou mafaufau i nai aso talu ai faasino i le Atua o loo faatasi mai ma tatou e pei o le malamalama i totonu o le pogisa. Peitai e lē o iinei o Ia tau ina fesoasoani mai. Faatasi ai ma le fesoasoani mai o le Atua, e mafai ona avea i tatou e lē na o nisi ua sao mai, ae o nisi ua manumalo. E faapefea ona tatou iloa leni mea? Auā o Iesu - le alofa o le Atua i le tinotagata - na Ia faafetaia’i mea uma na faia e tagata ia te Ia, ae le’i taitai ona taofia ai lona alofa ia i latou ma faamagalo i ai. Na Ia manumalo e ala i lona lē faatafa i lona alofa ma le usitai i lona Tamā, i le toe ofoina atu i le Tamā le galuega na auina mai o Ia e fai: ia gausia le pule ma le malosi a le agasala i luga o tagata. Ina ia suia atoatoa le oti. Ua mafai ona tatou manumalo i mea leaga uma e faia e le lalolagi ma tagata ia i tatou auā ua fa’aali mai e Iesu, pe a toe faaupu le Roma 8:39, e leai se mea e tasi i le foafoaga e mafai ona ia tuueseeseina mai i tatou mai le alofa o le Atua sa ia fa’aali mai. Pe afai tatou te talitonu ma faatuatua o le mea na fai e le Atua ia Iesu, e mafai foi ona Ia faia ia i tatou e ala i Lona Agaga, ona leai lava lea o se mea e tasi e mafai ona lūlūina lo tatou alofa ma le usita’i.

FAAPAIA MAOTA GALUEGA EFKS

TAELEFAGA, FAGALOA, APIA SASA'E

“A o le faatuatua, o le faalagolago lea i mea ua faamoemoe i ai, o le mautinoa lea o mea e le vaaia.” Eperu 11:1.

O Afioga Paia a le Atua ia sa tomua ai le Sauniga e faapaia ai le galuega o le Maota o le Galuega, a le EFKS Taelefaga i Fagaloa, ina ua mae'a ooti le lipine e le afioga Faletua o le Taitaifono Fono Tele, Susana Tunumoso Iosia, ma ulufale atu ai le mamalu o le faapotopotoga. O le susuga Asotasi Gu Time FT, le toeaina o le Pulega Fagaloa, KMTA Matagaluega Apia Sasa'e, Taitaifono Komiti Au Toeaina sa ta'ita'i le sauniga mamalu i le aso 30 Tesema 2020. O le susuga Tapuni Maulolo FS (faletua ia Tinoi Kaisara-Maulolo) le faafeagaiga taulagi a le Aiga Salevalasi, le afio o le Tuiatua ma le Aigaga, na saunoa i le Tala o le Galuega. O le tuualalo faifaiepa i le tele o tausaga a le tuufaasolo mai o afioga Tiakono Toeaina, mo se maota fou ma lelei e tua i ai le galuega, sa avea ma lu'itau mo lenei galuega ae sa fuafua lava i le malosi e gafatia ma le taimi talafeagai e faatino ai. O le tausaga 2017 ina ua mae'a le galuega tele o le Malumalu Tapua'i, na a'e ai loa le tofa e amata le galuega, ina ua mautinoa e mafaia e se toaitiiti ona fai se galuega tele - o le ta'iala faalefaatuatua lea na limata'ita'iina ai le Aulotu e 9 matafale. O le tupe faavae, o le foai a le afioga Fuiava Masani, faapea le afioga Atiifale Ulisese Iona (ua maliliu). O nofoa o le malumalu tuai sa faatauina i le ta'i \$200, faapea 'apa tuai e ui ina 'elea ae sa faatau lava ina ia maua ai se tupe mo le galuega. E faaopoopo i ai sailiga tupe masani o Bingo, Tausala, Lafoga, o le Toomaga mai le Ekalesia Aoao ma le faiga paaga ma le Blue Bird Lumber.

O le afioga Sinamaitai o se tamalii lava o le afioaga ae aumau i Amerika Samoa, na amataina le galuega. Na tula'i mai faafitauli ona o le faigata ona maua mai ona avanoa, i le tapu o femalagaiga talu le faama'i o le Koviti 19; a o se avanoa foi e sailiili ai le malosi tau seleni. Na foi mai le malologa a le faifeau ma le faletua ia Setema 2020 ma fa'auau ai le galuega e le afioga Sapatu Filipino. E \$262,051 le tau atoa o le galuega, e le aofia ai le tausiga o le aufaigaluega lea sa tuu ofo mai e aiga o le aulotu. O loo totoe ai le \$105,00 o le aitalafu o le galuega. Na faafetaia e le faafeagaiga vaega eseese ua ta'ua i lalo sa fesoasoani ma lagolagosua i lenei galuega tele.

Sa muamua lava faaleo le faafetai tele i le Ekalesia Aoao, e ala i le Laulau a le Fono Tele ma le Komiti Tupe mo le faamatuu atu o le Toomaga \$50,000. Faafetai i le Pule ma le kamupani a le BlueBird Lumber. O le Kings Construction ma le Swel Cons pe a afea lo latou afioaga i a latou galuega fai o le auala a le Malo, o le kamupani oloa SMI, Glory Construction i le afioga ia Fepulea'i, le afioga ia Sinamaitai sa amataina le galuega ae maise le afioga ia Sapatu Filipino le Matua o Faiva ma le Falefa o le Aiga Salemalama i le faamae'aina. E le itiiti foi le faafetai a le Faafeagaiga ma le Ekalesia Taelefaga i le Ekalesia Aoao ae maise i le Au Toeaina mo le tapuaiga ma tu'i le malipapaga a o latou alo faiva. Faafetai i le mamalu tele o e sa auai i lea aso - le afioga Sui o le Fono Sui Tofia, afioga LeMamea Tuietufuga Ropati AF ma le Masiofo, le Pulega Fagaloa ma le Matagaluega Apia Sasa'e ma le auvalaaulia i le nofo a faafeagaiga i soo se fata faitaulaga o le atunuu. E mulimuli ae sili ona taua, le faafetai ma le faamalo i le latou Aulotu pele i Taelefaga mo le soifua galulue, onosai ma faamalolosi, faatuatua ma alolofa i le Atua e ana le galuega.

O le afioga Taitaifono Fono Tele, susuga Tunumoso Soliola Iosia FT, na valaaulia e le taitai o le sauniga na te faia le Tatalo e Faapaia ai le Galuega. Na ia muamua faafeiloa'i le mamalu taue'e o le aofia potopoto, ae maise o aiga o le susuga Faafeagaiga ma le Faletua ua auai e molimau ma sii faatasi le viiga o le Atua, i galuega ua faia e a latou taulaga soifua ma lupe ua faalele mo le Tala Lelei. Na ia faafetaia le faafeagaiga ma le Ekalesia i Taelefaga ona o le soifua faatuatua, e tau ma finau mo le atina'e o le galuega a le Alii, lea ua matagofie ma ua tepa i ula ai le aso. O le galuega e le'i faia mo se tagata, ae mo le Atua ma Lana galuega ma Lona viiga. Sa outou seu i falemua, ao matou seu i falevaai - lenei ua e seu ua lagatila, ua e faapulou le tualima, se ua malo fai o le faiva. O le galuega fa'auau sa amata mai ma ua latou tu'ulima mai e outou tua'a ua lagomau mai ti'asa, o outou ua feagai ma le galuega nei, ma fa'auau pea e outou alo ma fanau o tupulaga a taeao; ae tumau pea le alofa o le Atua e faavavau, ma Lona mana e mafai ai soo se augatupulaga ona fai galuega tetele e ui ina to'agaogao. Ona ia tauaao atu lea o le meaalofo \$10,000 ma faamanuiaga a le EFKS Aoao.

(fa'auau itulau 15)

FAAPAIA MAOTA FAAFEAGAIGA, EFKS TUFUTAFOE, ITU O TANE

“O le faamoemoe ua tuai ona taunuu e faanoanoa ai le loto; a o le mana’o ua taunuu, o le laau o le ola lea.” Faata.13:12. Ua talafeagai tonu nei Afioga a le Alii ma le galuega tele o le Maota o le Faafeagaiga EFKS Tufutafoe, Pulega Itu Asau, Matagaluega Itu o Tane, na faapaia i le aso 1 Ianuari 2021. Talu mai le tausaga 2006 (ina ua tu’ua e Falefa Savea FS & Motootua), na amata galue ai le susuga Albert Faata’ita’i FS & Simalua i Tufutafoe, na la’ua faafaletulu’ia ai i le maota na afaina tele ia Ofa ma Valelia, seia oo mai i le tausaga 2020. O le tina matua ia Tuifaigā Luama Yoshida o se tasi o itutino ma le Matafale o le Aulotu, na asiasi atu o ia i se tasi aso i le Faifeau o Albert ma lona faletua, ma na ia vaaia ai le tulaga pagatia tutulu sa i ai le maota o nonofo ai le faifeau. Na faaosofia e le Agaga o le Atua lenei tina i le alofa, ma a’e ai le tofa ia te ia ma le nofo a alo ma le aiga, ina ia fai se fale lelei ma saogalemu e mapu i ai le auauna a le Atua ma fai le galuega. O le faafetai ma le naunautai o le tagata faatuatua, ia fai se galuega lelei mo lona Matai a o ia maua le malosī, ae maise o le avanoa lelei ua aumai e faatino ai. Sa le’i faigofie le faatinoga o lenei galuega ona o le tele o faafitauli, e pei o le 2 kamuta sa faia le galuega. Na amata e le tasi, peita’i e le’i o gatasi le futia ma le umele, i se finagalo o le tina ia Tuifaigā i le ituaiga maota e tatau ona i ai, ma le manatu o le kamuta ma ana auala sa fai ai. O lea na taofia ai le galuega mo se taimi, se’ia saili ma fa’auau ai le galuega ina ua maua le afioga i le Matuaofaiva. Sa toe tala ese le tele o le galuega na fai muamua, ma o le ala lea o le taugata o le galuega e tusa lona tau ma le silia i le \$800,000+ na faatupeina atoa e lenei tina ma lana fanau. E mae’a le galuega e aunoa se aitalafu o totoe ai. O le toeaina o le Pulega, susuga Amuia Seuala FT na taitai le sauniga, o le faletua ia Susana Iosia na ooti le lipine, a o le afioga i le Taitaifono Fono Tele na saunoa e faaleo le faamalo ma le faafetai a le Ekalesia Aoa o le susuga faafeagaiga ma le Ekalesia, ae maise o le tina ia Tuifaigā Luama Yoshida ma le fanau ona o le soifua faatuatua, tautua ma alolofa i le Alii o Iesu Keriso. Sa faamamafa ma toe faamanatu e le Taitai o le Sauniga faapea le afioga Taitaifono Fono Tele, Afioga paia a le Atua ia faatuatua ‘aua le

masalosalo i ai, i le tau ma le faamanuia a le Atua mo le tagata faatuatua e le gata i le upu, ae sili i le tino mai o galuega. Ia ‘aua foi le gata ai, e faapito pe faatapula’a le soifua tautua ae ia faifaiepa, aua e faapea foi le alofa sasa’a mai o le Atua - e le uma, e le faaititia, ae faateleina pea i lea tausaga ma lea auga tupulaga e faavavau. O le meaalofa masani a le Ekalesia e \$10,000 na tauaoina e lana afioga i le Taitaifono Fono Tele, e tali atu ai i lenei galuega matagofie ae maise o le valaaulia mo le Laulau Fono Tele ina ia auai atu e molimau. Sa le’i alo tamala foi le susuga faafeagaiga ia Albert ma le faletua, le Ekalesia ma le afioga Tufutafoe i a latou fa’aaloga maualuluga mo le afioga Taitaifono, susuga Toeaina taitai o le sauniga, le Pulega ma le Matagaluega tainane le mamalu o malo ma le auvalaaulia sa auai. Ua outou faia mea silisili ma le matagofie ma outou manumalo ai; ia faia lea ma viiga o le Atua, ae ‘aua lava ne’i ia te i tatou.

Aso Tofi, 31 Tesema 202, Savali i le malamalama

“¹²O a’u nei o le malamalama o le lalolagi; o lē mulimuli mai ia te au, e lē savali o ia i le pouliuli, a e ia te ia le malamalama o le ola.” Ioane 8:12.

Pe afai ou te nofo ifo i lalo e ‘ai, ou te tutu se mōli ga’o (ou te fiafia tele i mōli ga’o!) ma fai se tatalo pu’upu’u i le Atua e alofa faamalalama lo tatou pouliuli ma lavea’i i tatou mai mala ma puapuagā e oo mai pe afai tatou te aulia le po o faaososoga, toilalo, mafatiaga, gasegase o le mafaufau, ma amioleaga eseese. Tatou te aafia uma pe a ufitia e le pogisā ma o se taimi mata’utia. O se taimi e faaososoina ai ina ia masalomia le Atua, ia lafoa’i le faatuatua, ia siilima i taumafaiga po o le tumau ai i a tatou amioleaga. O la’u tatalo na ulua’i maua mai le ofisa o le Kopeline, o le sauniga mulimuli e faatino e monike ma taupousā a e le’i le’i tofafa i le po. Ua ou suia le fuaitau ‘o mea mata’utia **o lenei po**’ - le po ua fotua’i mai, i le ‘o mea mata’utia **o le po**’ ina ia saga faalatele atili ai la’u tatalo. A mafai ona tatou mulimuli ia Keriso, ua tatou savavali i le malamalama; atonu e pouliuli pato’i le po ma mata’utia, peita’i o le upu moni o loo tatou ui atu ai i totonu, pe a’oa’oina ina ia malolo filemu ai i totonu ma le mautinoa o loo i ai faatasi Keriso le malamalama o le lalolagi ma i tatou. O le a lava le ituaiga pogisa o loo e i ai, o le a le pogisa o loo i ai i latou o tatou talosia, ia la’a atu i totonu o le Tausaga Fou o loo pipi’i mau i le Atua, ia Iesu le malamalama o le lalolagi, ona ia te oe lea o le malamalama o le ola. O le isi a’u ‘tatalo mōlīga’o o le faafetai: ‘Faafetai le Alii e, ona o le malamalama e susulu mai i o matou pogisa uma, ma e lē mafai e le pogisa ona manumalo i ai.’

O E UA FAI I LAGI LE FOLAUGA

TIMENA TUSITALA VAGAI

(15/4/1938-27/11/2020) 82+7+13

O Timena Tusitala Vagai o le Tinā Tiakono o le matou Aulotu EFKS Elise-fou. O ona mātua o le susuga i le Faifeau ia Rev. Tusitala Vaelei ma le faletua ia Faalelei. Na soifua mai Timena i le aso 15 Aperila 1938, ae malii i lona aiga i Elise-fou i le aso 27 Novema 2020, ua atoa i ai le 82 tausaga 7 masina 13 aso o lona soifua. E 13 lana fanau, 65 fanau a lana fanau ma le 98 fanau a fanau a lana fanau. E 176 tagata na tupuga mai i lenei tinā. O Timena o se tinā e fiafia i le ola tapuai i le Atua, o le auuauna ua fai ma ana vaisū le vivii ma faamanu i le Atua i aso uma o lona ola. O lana pese e fiafia e usu i soo se sauniga, o le pese e 157, “Ave lo’u ola ia aoga, le Alii e, i au feau.” Na te faapotopoto i lana fanau ma lona aiga i taimi o lotu afiafi i aso taitasi, e pepese leo tetele. E toaga i sauniga lotu, aemaise ai o lotu a Tina, e iloa gofie Timena i lona siufofoga, auā e malosi lana malū. E auai i soo se tapenaga a le Ekalesia, o le faataliga o le faa-mati, o toonai a le Ekalesia ma ana fonotaga, e faamaopoopo i le galuega, e ui i le matua o lona soifua, a ua lē fai lona alofaga o le ola galue.

O ona toe sauniga na faia i le aso 4 Tesema 2020, i le 9.00 i le taeao, i le malumalu o le EFKS Elise-fou lava. O a’u na taitaiina le sauniga, o le susuga ia Ulugia Mata’u Matafeo (AF), na saunia le tatalo, o le susuga ia Taatiti Seve Sinei (AF) na faitauina le Tusi Paia. O le susuga ia Panapa Jnr. Panapa (AMNA), sa faaulufaleina lona sa ma saunia le lauga. Na faaagaina lava le manatu autu o lona aso, 1 Tesalonia 4:13-18, “Faatasi ma Keriso ma ola ia Keriso.” O le faaopoopoga a le ta’ita’i na sii mai i le Salamo 27:13&14 “Ana ou le faatuatua ou te le iloa le agalelei o le Alii i le nuu o tagata ola, po ua ou faavaivai lava. Ina faatalitali atu ia i le Alii, ina loto tele ia, e faamalosi foi e ia lou loto; ina faatalitali lava i le Alii” Sa molimau lana fanau i Samoa nei ma ē o i atunuu e mamao, e uiga i lona alofa faamaoni ma lana tausiga e lē faavaivai. E ui i le lē tagolima ma le toatele o lana fanau, ae sa saili lava se manuia mo lona aiga. O se tina e tausi faifeau, na te foaiina foi mea silisili mo le galuega a le Atua. Na faa-ekalesia Vagai ma Timena i le aso 21 Novema 1993, a o le aso 30 Iuni 2011, na malii ai le tamā ia Vagai. Ona fa’auau ai lea e le tina ia Timena lo la tofi Tiakono i le ekalesia, ina ua faafia i le aso 31 Aokuso 2011,

e oo mai nei lava ina ua valaau i ai lona Matai. O ona toe sauniga i le tuugamau na ou taitaiina lava, ma matou faatofa atu i ai i le pese a le au kerisiano, “Talofa uso e, tofaina oe. Ua sau le itupō e mālōlō. E ala oe pe a mavae le po. Tofa, Tofa, Tofa.” Manuia lau malaga Tinā.

*Saunia: Reupena S. Nofoaiga F.S.
EFKS Elise-fou, Matagaluega FALEATA*

EFKS TAELEFAGA

O le Lauga na saunia e le Taitai o le Sauniga e faavae i le Tusi faitau o lea aso, 1 Ioane 5:1-5, o le matua i le f.4: “Aua o i latou uma e fanau mai le Atua, e manumalo i latou i le lalolagi; o lenei foi le manumalo e manumalo ai i le lalolagi, o lo tatou faatuatua lava.” Sa faamamafaina i le Lauga le manatu autu o lea vaiaso - O LE UPU UAAVEA MA TAGATA - KERISIMASI MA IOANE - MEAALOFA SILISILIA LE ATUA, ma le manatu autu o lea lava aso, O E UA MANUMALO I LE LALOLAGI. O le valaauina e le Atua o le tagata i soo se galuega, o se avanoa e tau ai i le taua faalefaatuatua - e amata mai i le leai o se mea, seia oo ina tino mai mea tetele i le atoatoa, o mea e faia i le malosi o le faatuatua; o le auala lea na faatoilaloina ai e tagata paia le lalolagi ma manumalo ai. E pei foi o lenei au faatuatua i Taelefaga, faafetai i le faafeagaiga ma le faletua ma le Ekalesia. E ui ina matitiva ma toagagogao i le faitau a le tagata, ae sili ona toatele, malolosi ma tamaoaga i loto ma agaga ona o le faatuatua i le faatasi mai o le Atua. Na faavaivai nisi ma solomuli, ae na fai pea ma faamalolosi le faifeau ma lona faletua ma nisi aiga to’ā 8, ua atoa ai tino o Vaatausili. E le lilo i le silafaga paia a le Atua lo outou tautiga, e faamanuia mai o Ia e tusa ma la outou tautua faamaoni. Ofo atu la outou taulaga osi e fai ma viiga o le Atua, ia paia mo le mamalu o Lona suafa, ma ia faapea foi i feau ma galuega uma, o faatofalaiga e faia ai i totonu o lenei maota. Ia manatua le upu a le aposetolo, “O lenei, o’u uso pele e, ia outou tumau ma le le faagaetia, ia alualu lo outou faamalosi i le galuega a le Alii ma le le aunoa, ina ua outou iloa e le se mea faaleaoga lo outou tautiga i le Alii.” 1Kori.15:58.

IA MANUIA LE TAUSAGA FOU 2021!



Saunoaga Faamanuia Taitaifono Fono Tele

O lau pule ua tō tō tetele, ua aliali lou titi fai Ekalesia, ma lou faatuatua i le Atua fai mea sili. Ua lē maluelue lou alofa i le Ekalesia i le pola motu i tua, o leo o le talutalu fou ua e lē manatu i ai. Ona o lau vaisū lea o le fai taulaga mo le Alii. E faamaoni lou alofa i le Atua e sili ona faamaoni mai. O lea lava ua e solisoli mulivae i galuega a ou tua'ā ua fai i lagi le folauga. O loo matamata mai ma tapua'ia ou faiva auā le Ekalesia ma lona manuia. O la le Fai Salamo, "Le Atua e, a'oa'o mai i matou ina ia matou iloa ona faitau o matou aso ina ia maua ai le poto i o matou loto." Ia foai mai e le Atua le poto i o outou finagalo ma o tatou loto, le malamalama ina ia tatou iloa ai ona fa'aaogā tataua aso o le ola ua totoe.

Le Ekalesia pele e, faafetai faafetai faafetai tele lava. O le tatalo, ia faamanuia le Atua i ou aai ma ou laufanua ma lou sami. Ia faamanuia le Atua i ou maota ma ou laoa, ia faamanuia le Atua i lau ato ma le mea e palu ai au falaoa. Ia faamanuia le Atua pe a e sau, ia faamanuia pe a e alu atu. Ia faamanuia le Atua i lau fanau ma fua o lou laueleele. Ia faamanuia le Atua i le nuu ua foa'iina mai e le Alii le Atua ia te oe, ma ia faateleina e le Alii mea lelei uma ia te oe. Ia tatala mai e le Alii Lana tuugā-oloa lelei mo oe – o le Lagi lea e foaiina mai ai le ua i ona po e tataua ai. Le Ekalesia e, o outou lauulu uma lava ua faitaulia uma ia. O lo outou onosai foi tou te maua ai lo outou ola. Ia viia le Atua i lo outou soifua fai taulaga ma lau tautua faifaipea.

Ua tatou i ai i le vaitau o le Etiveni, o le manuia o le Atua ua aga'i mai, ua oo mai lava. Tatou fiafia ma olioli, auā ua lē galo oe i le Atua. O le aso fiafia ma le feau o le manuia ua alalaga ai le au agelu. Ua soifua mai le Pepe o le Kerisimasi. O le Mesia, o le Tupu, o le Atua malosi, o le Tamā o le Faavavau, e i Lona Ua le Malo, o le Faipule, o le Alii o le Filemu. Ia ia i tatou le filemu lea o le Alii. Ia soifua pea le Atua ia te oe Samoa, ma ia suluia ai pea o tatou laufanua i Lona malamalama auā o lo tatou manuia lea. Le aufaigaluega faifeau, tautuana lou valaauina. Ua e aumau i nuu ese ona o le finagalo o le Atua. Ia faamaoni ma faamalolosi e folafola le Tala Lelei ia Iesu Keriso. Manatua ua faapaiaina oe mo le Atua ma Lana Tala Lelei. Ia tatou mataala e le aunoa. Ia malosi lau tatalo. Le aufaigaluega, tatou faatāua Pūgafono ma Faavae o le Ekalesia e taialaina ai lo tatou ola galulue ma ia faamaoni i le Ekalesia. Matua Penisione, faafetai i lau tapuaiga ma lau tatalo. Ia mana pea lau tatalo e manuia ai le alo faiva o le Ekalesia i ana feau ma galuega. Ia faamanuia tele le Atua i la outou tapuaiga.

Le Atua mamana e, faamamalu mai Ou aao ia Samoa. Pe a tusa ai ma Lou finagalo, ia fegaoioia'i Lou Agaga i taumafaiga lelei uma mo le puipuiina o lenei atunuu. Ia maua e Samoa uma se Kerisimasi fiafia ma se Tausaga Fou manuia i le faatasi mai o lo tatou Alii. Soifua.